

本朝分省人物考

人物考卷之十目錄

北直隸大名府

秦裕伯

宋訥

劉矩

蔣廷瓚

柰亨

史五常

王越

李衍

甘澤

張如宗

吉惟善

劉珂

侯英

王綆

李珏

趙廷瑞

申鑄

晁璪

張師伊

李思孔

吉陳

王光祖

王永壽

穆文熙

晁東吳

丁蕃

王循吉

盧學理

王一元

魏允貞

魏允中

張瓘

耿介

盧枏

補遺

李化龍

本朝京省人物考卷之十

北直隸大名府

秦裕伯

秦裕伯字景容大名縣人從父仕元都就學胄監登第累官至福建行省郎中會世亂棄官寓揚州復避地松江之上海以養母母卒舉喪如禮時張士誠據蘇州遣人招之不納吳元年上命中書省檄下松江起之裕伯對使者曰受元祿二十餘年背之不忠也母喪未終忘哀而出不孝也乃上書中書省固辭洪武元年檄起之稱疾不出上乃手書諭之曰海

濱之民好鬪裕伯智謀之士而居此地苟堅守不起  
恐有後悔裕伯拜書入朝辯博善爲辭說 上命爲  
侍讀學士 上登鍾山命裕伯與學士朱升張以寧  
等扈從擁翠亭給筆劄卽景賦詩甚見寵待洪武二  
年降侍制尋出知隴州卒於官

宋 訥

宋訥字仲敏大名府滑縣人父崇祿元陝西行臺侍  
御史追封魏郡公謚忠肅訥爲名家子雅性持重不  
妄言笑讀書記問該博登元至正癸卯進士筮仕鹽  
山縣尹遭亂隱居入 國朝文名益昌洪武二年中

書省徵儒士十八人纂修禮樂訥與焉事竣不仕而歸五年秋過元故宮盡焉傷之作詩以寓黍離之感誦訥詩者知其明于春秋華夷之辨也十三年四輔官杜敷薦訥才堪任用 勅召至京 上與訥語大悅之授國子助教橫經發難擊節廓塞學者如客得歸十五年五月同諸儒應 制撰諸勅文操筆立成雅稱 上意超拜翰林院學士奉議大夫尋 命撰國子監碑文又復稱 旨賞賚衣帽文綺及鈔已而召其子安賜鈔十錠七月 上觀尚書至敬授人時謂訥曰敬天之事後世中主猶能知之敬民之事則

鮮有知者蓋彼自謂崇高故威嚴日重而恩禮寢薄  
由視民素輕故也視民輕則與已不相干而畔渙離  
散不難矣惟能知民與已相資則必無慢視之弊故  
曰可愛非君可畏非民衆非元后何戴后非衆罔與  
守邦尋有上治平策者 上覽之顧謂侍臣曰此人  
論治而不及用賢天下之大乃欲朕一人理之乎蓋  
獨智自用則所見者狹資賢而用則所及者廣訥對  
曰誠如 聖諭但賢才之在天下人主豈能周知必  
賴羣臣薦舉得賢與否繫夫舉之者何如耳 上曰  
然觀其舉者即可知其人之賢否矣十一月改文淵

閣大學士年逾七十時大學初成中外歲貢生徒日衆適異愜者掌之師生相奸教尼不行十六年訥轉朝列大夫國子監祭酒請于上嚴立學規諸生皆知敬畏上由是特厚眷之慮功臣子弟有不服朴罰者命曹國公李文忠兼領監事由是貴胄肅然受教會訥有疾上遣中使致諭恒謂訥骨格必壽適有畫工至上命繪其像肖焉喜溢天表以其子麟主望江薄特勅召之還俾便侍養其被遇優渥如此十八年二月久雨求直言訥獻安邊策云備邊固在乎兵食足食又在乎屯田漢本始年匈奴爲



寇趙充國將四萬騎分屯緣邊九郡單于聞之引去  
人以四萬騎分屯九郡而充國統制其間則當時之  
籌畫區分槩可想見諸將中勇智謀略豈無如充國  
者哉宜選數人每將以東西五百里爲制隨其遠近  
高下立法分屯率五百里屯一將布列沿邊之地遠  
近相望首尾相應耕作以時訓練有法遇敵則戰寇  
去則耕此長久安邊之策也 上嘉納之遂令邊軍

皆屯田且耕且守著爲令乙丑戊辰兩科 上策進

士魁選恒在大學召訥褒賞撰進士題名記立碑於  
監門學錄金文徵畏其教範嚴厲嗾吏部尚書余燦

移文以年老致仕比訥 陛辭 上訊知其故以  
蔽賢擅權并文徵等皆誅之 賜諭慰訥居位如故  
二十二年五月建歷代帝王廟及廣惠祠落成例使  
翰林詞臣記其事 上以訥文體莊重乃 特命訥  
撰之訥居常寢食恒在廂房未始一日宿于家二十  
三年春正月訥有疾 上遣尚醫來治二月乙未朔  
疾革子麟等托諸監官懇辭歸家訥厲聲曰是何風  
雲氣少兒女情多况在丁社兩祭齋戒中邪丁酉祭  
畢乃就昇歸口不及家事薄暮甫抵家卒年八十  
上自製文遣官致祭迨臨發柩時 上再遣祭舟車

之費一出于官故事文臣四品無給費者蓋異數也  
長子麟擢進士第拜監察御史出主望江簿次復祖  
鄉邑訓導其後辛未太學生有連舉大魁者 上思  
訥曰此宋祭酒訓迪之功也凡諸生守官稱職者多  
出訥門 上每舉訥爲教國子者楷法復祖服闋

上召爲國子司業進而諭之曰若尚思繼武若翁也  
其始終眷注自開 國以來文臣未有其比人以訥  
素履純恪所致云訥家西南三里卽瓠子河昔人嘗  
構亭名曰西隱訥更築白雲茅屋其間故所著詩文  
二十卷號西隱集今行于世

劉矩

劉矩字仲方開州人體貌魁梧器宇凝重垂髫時恪  
執禮度過市未嘗舉目它顧孜孜問學不少以外物  
櫻心鄉黨固已待以鉅人長者既長從張好直受舉  
子業不數載就試行部侍講曾子啓中允鄒仲熙見  
其文大嘉之拔置第二比廷對 太宗復於羣策中  
親擢爲第二蓋永樂八科中北士之及第者自矩始  
也矩官翰林由編修陞修撰前後僅九載引疾家居  
踰二十年德性溫粹如玉生平殊無疾言遽色尤篤  
于孝友外艱歸毀瘠終三年禮無少違內艱亦然方

聞母疾卽䟽乞歸侍時 宣廟實錄成立遷官不俟  
也在職忠敬其事雖微必謹一時朝野自宰執下見  
者罔不稱曰君子家居嚴於祀先一䟽果必薦掃迹  
公門聞人過失口未嘗一談犯者弗校酒愈酣儀檢  
益整清苦之操始終不渝視非義物漠如也嘗有寄  
以金帛者其人死初無遺言亟致書其子悉歸之故  
人魏良夫以蒲守遠戍窘甚惻然出囊中賜金濟焉  
環所居無遠邇強梗者率革而良士夫無論及門與  
否僉表式之有過者恒慄然懼其聞人才籍以造就  
尤衆諸門人皆列職中外卓卓爲時所稱其爲文詞

黜華藻務以理勝壽七十一而卒

蔣廷瓚

蔣廷瓚字邦瑞滑縣人少有學術識達治體洪武中以才行薦除都督府經歷改嘉興府通判永樂初陞濟南府同知五年陞兩淮運使所在以清介稱七年召陞工部右侍郎八年命清萊登青莒等郡民戶九年命濬黃河十一年設貴州布政司以廷瓚練于政務特旨遷授比至撫治夷民綏靜疆宇一應事宜規畫咸當大振聲望竟卒於官貴人至今祠祀之

柰亭

李亨字子真郡庠生究性理之學通五經尤長於易以易學見知於文皇帝授以密旨永樂初遣使召至京師欲處以顯職力辭願就教乃除荏平教諭調利津縣尋陞四川永寧府教授初至訓迪有方弟子多有成績已而從尚書黃福征交趾多贊畫功乞休歸學者猶質問經史正統間疾卒郡守李瓚覩其遺文知學有本源舉以配祀劉忠定祠

### 史五常

史五常內黃人父萱洪武間任廣東按察司僉事秩滿將行疾卒時五常甫七歲力不能扶柩還家其母

諭五常曰汝父殮時有大錢置柩中汝謹識之俟汝  
長尋訪歸葬五常事母至孝不去左右及母死乃入  
廣中求父櫬歲久迷失所在五常旦夕號顛見者無  
不流涕已而臬司諸寮聞之命所司物色竟獲骸骨  
并大錢如母言遂以禮殮殯官給舟車歸葬祖塋去  
其父沒時垂五十載矣廬墓三年正統間有司以  
聞旌表

王越

王越字世昌大名之濟人博涉書史爲詩歌文章援  
筆就成而藻思益發爲人多力善騎射好談說經濟



大略睥睨顧盼有天下志二十六舉景泰進士方對策大廷忽有旋風起攝其策雲表已而不見皆怪異之及秋而朝鮮貢使附越策來而曰其王方視朝有旋風捲一物下者則進士卷也敢以聞景帝閱姓名謂吏部曰識之此當任風憲于是繇進士選人得監察御史英宗復辟日視朝越進止奏對數目屬之時寇深長都察院東濕僚吏亡可當者而越精于臺事所建畫必出深意表以故愛異之久之擢山東按察使名聲藉藉尋大同有虜警當置巡撫上喟然曰安得如韓雍者而任之時雍已撫宣府吏部

乃徵越召見便殿越故偉服而短其袂 上熟視良久曰非故快御史耶可使弁而將也遂擢右副都御史以行會虜稍徙去越乃飭兵政繕器甲簡士伍修堡寨爲經久計尋以病告召還京病良已明年協理院事久之以總督視師延綏輕騎襲破虜于崖窰川俘四十餘人鹵首加百遷左副都御史又破之于黃草梁俘五人鹵首百二十進右都御史前是文臣視師者多從大軍後出號令行賞罰而已至越而始多選驍勇跳盪武騎爲腹心將而與虜搏始能與虜鋒相角間設伏邀虜破之俘斬百餘獲馬牛羊器仗稱

是越復謀知滿都魯字等三酋自河套渡分寇西路而其妻子營于紅鹽池乃率總兵許寧等以精騎五千襲之兩晝夜行三百三十里至其地分兵千餘爲十伏以相救而身與寧等分兩哨薄其營遂破之擒斬三百餘級獲其女穉駝馬器械無筭焚其廬帳而還時滿都魯等行剽至韋州頗有所獲而遇諸鎮兵邀敗之賊旣以失利矣歸而廬帳妻子畜產皆蕩盡乃相顧慟哭遠徙不敢復居河套故地捷聞再賜璽書褒諭俄召還京論功加太子少保食從一品俸同李賓掌都察院事兼提督十二營兵馬又一歲進兼

兵部尚書明年復加太子太保時 上所寵信中貴  
人汪直方領西廠得訶察中外事威福傾一時而年  
少好言兵越亦與之好直以虜酋西犯邊 詔保國  
公永爲平虜將軍率師西討越爲總督直仍監其軍  
令永將大兵由南路越與直將輕騎由宣府大同俱  
會于榆林旣至大同謀虜帳在威寧海則選二鎮之  
勁騎二萬餘分道乘風雪薄之虜狼狽出戰遂破虜  
斬鹵甚衆捷聞越遂進封威寧伯歲祿千二百石子  
誥劬子孫世世承襲越旣封不當復領都察院而御  
史許進等上章稱越功德引王驥楊善例請仍領院

事而越亦不肯就西班欲仍例大學士萬安吏部尚書尹旻而下俱許之當是時保國公永師至榆林甫三日無功召還尋復命越等出師至大同適虜從東山等墩入境剽掠越縱兵擊之擒十人斬首百級獲馬七百餘匹 詔進越太子太傅增歲祿四百石復錄一子官是役也斬級少于法僅下賞而封拜橫溢則 上以直在事欲貴重之越于是改掌前軍都督府總督五軍十二營兵馬蓋越以文臣爵不得侯改右班或可得侯也而汪直亦爲其儕所忌惡遂復僉越爲平胡將軍直仍監其軍駐宣府調度擊虜虜已

退越等請班師不許遂巡延綏而虜入寇河西清水營等處越等使遊擊將軍劉寧敗之于塔兒山叅將支玉敗之于大窰梁延綏總兵許寧敗之于三里塔擒十二人斬首虜三百餘功最多虜亦創懼不敢近邊而捷聞僅加祿五十石汪直賞亦薄尋改越征西將軍鎮大同猶與直共一鎮大學士萬安等請移越帥延綏以離之而命延綏帥許寧鎮大同言者以寧直不相能遂改直於南京御馬監旣行則姦事大露給事御史糾直八罪因併糾越詔削越官爵追誥券徙置安陸州而盡奪其諸子錦衣都指揮使等官越

之敗由汪直然直尚得爲奉御一時朝士大夫雖快越之去而有謂其罰太重弗平者越最名能知人其在臺所旌拔御史屠瀟侶鍾等皆爲大官以至同列而故吏將佐多昷貴時時稱越才弘治初赦還鄉尋上書自列寃狀會有左右之者得復左都御史致仕越居常喜奢華自奉若諸侯王而其御軍恤下財往來若流水籠罩豪傑不知所從人皆願爲之死機事百端閃倏變幻出沒若神鬼軍行過陝西秦王賜宴奏伎越因盡乞其伎女歸一日大雪方坐地鑪使諸伎抱琵琶而捧觴而一千戶訶虜還卽召入與談虜

事甚暫大喜曰寒矣手金卮飲之復談則益喜命絃琵琶而侑酒卽併金卮予之已又談則又喜指其中最姝麗者曰欲之乎以乞汝自是千戶所至爲效死力積功至指揮其夜襲虜帳將至風暴起塵翳目衆惑欲歸一老卒前曰天贊我也去而風使虜不覺歸而卒遇虜入掠者還而我據上游皆是風也越不覺下馬拜功成推卒功以爲千戶越之在安陸與還濬時射獵帳飲聲樂如故家近京得通於中貴人李廣爲上言之中旨召掌都察院事爲臺諫所論阻時西虜犯邊急兵部言宜得一重臣時屠瀟爲吏部知越



且德越而中貴人廣史之以越名上 上遂許陞見

上慰諭有加進太子太保仍兼左都御史總制甘肅寧夏延綏軍務諸鎮守巡撫而下悉聽節制仍許以便宜行事越至卽擣賀蘭山之別部行剽者覆之斬首捕生過當捷聞加少保太子太傅請復哈密封以兵援其王還國疏上不報而中貴人廣敗自殺言者皆首攻越 上雖雅重之不爲報而越坐憂悴病劇遂卒年七十四贈太傅謚襄敏祭葬如禮越之再起欲還伯爵竟不得而諸子多官環列者越姿表奇邁慷慨自許歷西北諸鎮身經數十餘戰其于邊徼

險易虜情真僞將士之強弱勞逸歷歷在胃臆每出奇取捷謀定而後發同事者莫能測嘗與保國公永帥千人巡邊虜猝至主客不當永欲走越止之爲陣列自固虜疑之未敢前薄令騎皆下馬啣枚魚貫行毋反顧自率驍勇殿從山後走五十里抵城虜不覺明日乃謂永曰我一動虜躡擊無噍類矣結陣示暇形以惑之也次第而行且下馬無軍聲故虜不覺也其智勇足備如此雖古名將何以加焉

李衍

李衍字文盛姓李氏其先山東歷城人永樂初有謫

成南丹者後改編隆慶州民遂籍隆慶衍自少穎敏  
爲州學生有聲景泰壬申登進士第授兵部主事歷  
陞員外郎郎中皆舉職成化二年陞河南右叅議檄  
所部課民種桑棗戶若干株因以考長吏勤惰且令  
月條上其他政善則溫言慰之不善則訶譴不少貸  
由是州縣之吏罔不懲勸四年丁母憂服除改四川  
奉 勅提督松藩等處糧儲出見彭索河荒田彌望  
乃召其土人而問之曰是可耕地而不耕何也衆皆  
謂生蠻往往擾耕爲患則相視之害設橋梁墩堡塹  
柵爲防民乃耕耕遂無擾時松藩有堡曰張臘茂州

有堡曰松溪皆爲生蠻所攻衍與叅將前後擒殺數百人蠻乃遠遁捷聞有寶鈔金幣之賜灌縣都江堰壞歲役夫四萬人修之吏得夤緣爲姦去其十九築不逾歲而功告成民永賴焉七年陞河南右叅政其居官聲實一如叅議時十一年陞江西右布政使未幾陞都察院右副都御史巡撫河南至則剗刮宿弊理冤獄黜賊吏定九等差役法時黃河水溢城不浸者三版行視東南角低下乃分命守土之官日夜䟽濬始免決嚙患十六年陞戶部右侍郎尋奉勅巡視山海邊關整飭兵備置牀子弩一萬五千張弩可射

三百餘步又設飛石飛木可發五七十步者各數十萬削山坡成峭壁東西數百里歸而以圖進 上賜鈔四千貫二十年轉左侍郎權尚書事時河南山東北直隸連歲旱穀無所出州縣當輸邊者類橐銀就糶以輸米踊貴斗至數百錢然亦實無饑石賣者而武吏催督道路旁午勢甚張皇聞之乃請輸銀太倉而以太倉之米轉輸於邊米價遂平二十年奉勅總督三邊軍儲兼賑濟饑民時關陝不雨三年矣齋心默禱所至輒雨又引渭水爲渠經行百餘里以利居民是歲大稔民賴以全活者甚衆還朝復具圖以進

上喜復有寶鈔之賜明年陞本部尚書總督京通  
兩倉內外僚吏素熟其名皆慄慄危懼惟恐有犯之  
者時雖不大聲色而事固無不理也二十三年上疏  
乞身以歸買田築室於隆慶城西北日與親舊觴咏  
其中或問以官事則不應弘治五年以建立 皇太  
子恩進一品階七年卒於家年七十有四

甘澤

甘澤開州人號東閣先生與其弟潤俱以純孝稱自  
爲兒時凜若成人能以色養歷官御史山西憲副常  
祿悉以奉養旣而謫滁州天順改元召還至張秋聞

本朝名臣列傳卷之十一  
陶仲義  
父訃痛哭躄踊幾絕徒跣三百餘里歸葬遂廬墓側  
蓬首垢面日暮泣奠盡哀期年有兔及蛇游墓傍馴  
擾如常潤亦篤孝成化間有司以聞兄弟並蒙  
旌表

張如宗

張如宗大名人本小興州人父原政始徙大名如宗  
少家貧力學以端謹聞以貢士爲鴻臚寺序班轉光  
祿寺丞正統時嘗奉詔巡行真定諸郡問民疾苦  
狀會諸郡蝗設法捕之督徵川陝茶馬還擢四川叅  
議子倫登天順丁丑進士遂授劾還故里躬鋤蔬畦

灌園自給倫官太原太守便道歸省郡太守過候留  
與飲倫持饌上饌鞠躬待命如童子禮饌既具卽退  
立廡下太守邀侍席倫退走不敢當如宗謝曰幸君  
侯過敝廬老夫第主之吾兒特將酒耳郡太守惶恐  
起去乃不得已始賜品食廡下竟不敢廁席其方嚴  
之旨類此去田園十里數騎驢往來道中田間父老  
數相追隨諷以孝弟力田人人感悅衆比之漢石氏  
父子云弘治中入祀鄉賢

吉惟善

吉惟善開州人少穎悟過人性恬淡進退雍容而遂



於性理之學不事舉業永樂初以經明行修舉辭不就  
就有司嘗敦請署州學事端方整肅言動不苟後學  
宗師之年八十有三卒於家

劉珂

劉珂字伯瑒開州人少孤奉母至孝正德癸酉鄉試  
第三登嘉靖癸未進士未授官卽上疏乞終養呂涇  
野先生雅重之贈以詩有曾子終能傳一貫孝經真  
脉未嘗差之句旣歸里居足不履公府定省之暇惟  
授徒講學平涼趙太史時春其門人也後數歲母疾  
卒哀毀過禮鄉人稱孝焉已而授刑部主事歷郎中

以廉平著聲是時有貴戚干犯法紀諸司皆避事無  
敢當者大司寇每委重珂珂立爲剖斷卒無異議尋  
擢陝西僉事盡心屯政甚著勞緒監司交薦之上  
特勞以金幣歷陞本省副使俱有清慎之譽然於仕  
進蓋澹然也遂乞休以歸鄉之後進咸稱珂有古人  
之風云

侯英

侯英開州人任至河南副憲與兄侃俱以孝稱年十  
二三時母鍾氏眼疾憂泣輟食每夜稽首祈祐越四  
十九日疾乃愈後官江西按察使母死訃聞號泣幾

滅性奔還與侃同廬墓側有白鷺數千旦夕飛鳴塋  
前人以爲孝感所致有司以聞旌表

王 綆

王綆字邃伯別號龍湫先本鳳陽人洪武初避兵於  
開遂爲開州人綆童時莊重不羣少長卽知敏學弱  
冠中弘治戊午鄉試春試不第卒業大學先後所交  
皆海內名士乙丑登進士授戶部主事尋陞本部員  
外郎時權瑾用事羣閹倚勢請託綆不顧未幾父卒  
官邸哀毀扶柩還葬服闋陞河南衛輝知府振舉宿  
廢屏除積奸牘牒滿案兩造盈庭從容詳處皆中情

理儒學諸生季必嚴試重行賞罰皆始然而終服丙子當鄉試監臨東塘毛公以縉有文望辟外簾錄文多出其手毛公嘉曰中州之錄可以式矣特疏薦曰知府王縉學問深邃可學校憲職丁丑當考績時歲歉撫按以縉素得人心留撫之又二年遷湖廣副使初衛輝爲水陸南北通衢臺省權貴過者連車接轎惟庭見一揖人稔知其素亦不深尤也至湖廣適

武廟賓天羣臣奉迎世宗嗣統巨闕谷大用者八黨之一亦在侍中強之長跪縉不屈肆行悖侮縉脫冠裂服奔赴王府伏啓深慰答之而卽日棄官歸比

登極後上疏奏劾大用奸惡辭甚激切凡五上而大用斥矣尋起復河南副使鑛寇王鏜橫行河朔間討平之總督奏言副使累經戰陳親冒矢石故致克捷癸未陞山西右叅政時巨寇黃大寶標掠殺戮流毒郡邑以計擒之當道疏薦改鴈門行僕卿乃乞歸疏凡三上始得允己丑薦起四川左布政使土番芒部讐殺累年以恩信諭平之會母疾具疏乞歸未幾丁內艱服闋起江西甲午陞都察院右副都御史巡撫本省地方以恩詔階通議大夫廕一子入太學其撫江西也督逋稅清訟牒禁侈俗理陂塘恤民瘼事關

藩臬卽犯衆怒亦舉行之乙未擢大理卿大理自正  
德以來避部院尊要久失叅駁之職力舉行之由是  
衆情不堪私比者多不便左遷山東叅政蒞任疾作  
乞休不允部移慰留而疾愈甚䟽再具未上而卒入  
仕來凡四里居絕不干謁有司取與進退無毫髮苟  
日用居處蕭蕭如寒士平生雖好爲詩文然多不存  
稿卒後訪之親友僅得三百餘篇痛兄氏早亡撫諸  
孤若子先世所遺產盡以畀之卒年六十一祠祀鄉  
賢

李珏

李珏字廷重別號後菴世爲開人甫四歲喪母孺然  
子立鮮伯叔兄弟嶷然聰穎倍於常兒年十八入郡  
庠州守見所爲文曰此公輔器也深重之弘治乙丑  
登進士第初授長洲知縣年甫二十有五剪剔吏蠹  
聽斷詳明遠邇以神明稱之居二載適逆瑾用事誣  
逮至京縣人爭歛金帛以饋瑾正色拒之曰余爲民  
獲罪若復歛民以脫余是益余罪也事亦得白三年  
陞刑部主事歷本部員外郎中遂菴楊每言法曹中  
才能明練必曰李廷重部居三載陞東昌知府政先  
大體事集民安修葺城郭大建關橋東人至今誦焉

未幾調劇常州甫一載丁繼母憂終制補青州府青  
有鹽鑛多鉅盜比至擒其渠魁撫其餘黨悉爲善良  
郡人生祠之陞山東按察副使兵備徐州徐爲兩京  
要衝有司疲於供億民多逃亡裁浮節冗交際悉有  
定式自奉尤約往來雖貴公知厚僅留一飯人亦諒  
其廉不以爲慢里甲之困由是少甦時大盜王鏜聚  
衆數萬行劫充濟選委調集指授方略戎服督陣入  
賊穴巢遂蕩平焉總督余公疏其事以聞有白金綵  
幣之賜陞浙江右叅政一年陞山西按察使素性明  
敏剖決如流凡疑獄數年不決者悉解晉人至今思



焉陞都察院右僉都御史巡撫甘肅抵任三月以福建事被逮回京福建事原臬晉時所勘也朝見致詞上深奇其丰采異常中貴密示上意曰廷鞫之日若能少順上意諉責巡按豈特脫罪當有不次之擢笑曰死生榮辱自有定分臨難二心非君子所爲豈敢欺天以徼寵也獄成謫戍廣西潯州去國萬餘里羈配所十餘年隨行親屬瘴癘死者自秦安人以下十有七人處之泰然略無怨色尋蒙恩還里居四載爲嘉靖壬寅時大虜闌入鴈門失守畿甸震驚廷臣交薦召以原職起任提督鴈門等關兼巡撫山

西地方被命毅然就道至之日督率將領行視關隘  
乃陳禦虜事宜及增兵築邊預定戰守之策 上皆  
嘉納焉遂增叅將四員築邊垣八百餘里至今賴之  
又調選民兵分布要害是歲虜不敢南犯璽書褒獎  
賜以文綺居晉一載夜以繼日焦思運籌寢食俱廢  
而精神已憊矣引疾乞歸 上不允溫詔褒答感泣  
力疾視事再踰月疾增劇瀝誠懇疏 上鑒其忠誠  
許暫還仍俟後命抵家又四載爲戊申遼左不靖  
上復起用至遼增築屯堡奏調河間青州之技卒添  
募錦義寧前之兵馬選用土人之精壯區措大備戊

申冬召爲大理卿時方候代虜數萬入寇虜意以將  
行不復設備不知協謀備預已萬全矣遂進督諸路  
兵馬嚴申號令設伏扼險鏖戰累日得虜首一百五  
十級虜器倍焉遼人謂二十年來斬獲未有如斯之  
盛捷至 上嘉悅廷臣方議行賞而爲勸者所擠功  
遂不錄在遼雖未久值大虜內侵兵食之資禦攘之  
略日夜焦勞雖力致膚功之奏而精神又非居晉時  
比也到任未期月遂上疏乞歸 上允之賜致仕卒  
於家

趙廷瑞

趙廷瑞字信臣別號洪洋開州人生而敏悟日記數千言總角入郡庠督學浚川王公見其文大異之登正德辛巳進士改翰林庶吉士壬午授戶科給事中尋養病家居既起歷陞刑科都給事中時故相張璁以詹事擢兵部左侍郎上章論璁進士六年遽爾擢貳本兵恐後進奔競之徒率以璁借口因論吏部尚書廖紀徒負重望不能因事納忠言雖不用聞者憚之武定侯郭勛者專恣詭法嘗以私意釋罪人於配所刑部尚書高友璣侍郎許讚右都御史熊浹大理少卿曾直錦衣衛指揮使路安等不能執法并論之

疏上友璣致仕餘各罰俸有差勛革去祿米及營務保傳提督宣大軍務缺員兵部尚書李承勳薦左都御史王憲憲難之瑞論憲擇官避事非大臣體憲竟罷去他如論李琮爲江彬爪牙齊佐等爲錢寧羽翼張仁以么麼伶賤潛通逆藩及太監韋霏等奸狀皆見嘉納一時直亮之聲著於中外吏部嘗推陞河南叅政及南京通政司叅議上皆不允曰趙廷瑞着在京相應員缺推用其見知如此辛卯歲陞通政司右通政提督騰黃時父直菴翁迎養京邸膺疾思歸屢疏得請歸養抵家而翁遂不起服闋復除前職丙

申陞南太僕寺卿戊戌改光祿寺卿 駕幸承天  
庭瑞鳳從乃上言行管倉庫珍膳或不能辦請以土  
產時物供用公私兩便 上嘉納之 聖駕還宮以  
建儲事推恩兩京三品以上官皆得蔭子入監乃以  
弟廷璋爲父母隆慶上疏以讓其弟己亥用廷薦陞  
都察院右副都御史巡撫陝西抵鎮首陳考察王府  
文職官員次陳宗室私出郭木虜駐套請預計軍餉  
以保障地方時俺答阿不孩率衆渡河住牧套中乃  
與總督軍務兵部尚書松石劉公議定方略大致克  
捷斬獲首級百餘中有酋長首二顆疏聞 上悅進

兵部右侍郎兼都察院右僉都御史仍巡撫其地先是秦府輔國將軍秉樛等縱家奴責債動至拘繫平民勅諭之自是宗藩斂跡在鎮三年累奏虜功辛丑上遣行人張汝隆齎賜白金彩幣及勅諭欽獎

廷瑞以寵遇優隆益加策勵秦人稱巡撫關中者馬端肅余敏肅之後惟瑞能不媿云壬寅改戶部右侍郎總督宣大山西偏保等處軍情緊急兼程赴雲中所在官民不擾而兵食足未幾丁母憂上念其勞特予祭葬服闋陞本部左侍郎兼提督太倉尋改兵部左侍郎攝部事總督左都御史翁公巡撫山西都

御史孫公條陳邊事各有異議瑞維持調護懸合事  
機俱免債事會試天下武舉爲提調官盡革宿弊丁  
未陞南京戶部尚書未抵任卽改兵部尚書會北虜  
結營直抵隆永郊圻震驚䟽上防護京師內外五事  
爲國家根本之慮虜亦聞風遁去戊申遼陽奏捷斬  
獲虜首甚衆已酉北虜大舉入寇官軍鏖戰有功加  
太子少保賞白金紵絲素體孱弱加以軍務叢雜憂  
勞過度以致痰火疾作眩暈顛厥絕而復蘇乃懇求  
休致 上謂其託疾求退乃與閑住蓋 上意欲重  
用之故責之者深也還里惟留心藥裹端居簡出親



戚友朋罕見其面六月二日忽晨興命駕造直菴墓  
所撫視松楸摩挲石獸低徊不忍去少頃疾作輿歸  
遂不起

申鑄

申鑄字鎔範性端嚴有家範諸子自黌校歸猶俾之  
入田力作曰使知所本嘗以嫁女使長子持數十金  
入臨清市奩具遺其金反命曰道遇談易者悅之遂  
忘金卽置不問以吏事就選仕爲金壇簿主徵稅先  
是入穀之量恒溢怒曰是焉用量爲也命概之百姓  
稱平主計者置金米中糞入賄發之抵罪宿弊頓革

屢獲優獎偶遘疾數日漸劇歎曰吾居官不苟取今死何以歸葬耶子淵見其危也權辭曰適有餽兒贖者多憂大驚詬曰汝敗吾平生矣遂面壁卧叩頭百解之竟不返顧而卒今兵部員外郎燧乃其曾孫也魏人咸曰申氏蓋有世德云

晁 璫

晁璫字君石別號春陵開州人性至孝少失恃奉繼母以孝聞及長博極載籍工於詞賦高古冲雅出漢唐諸名家右嘉靖辛丑登進士第選翰林庶吉士一時海內俊髦悉推讓焉尋任檢討專制誥修會典

習於典故多所裁定分主會試甄選尤精繼以父疾懇疏求養得告家居於城隅之西築精舍奉養其間親卒哀毀盡禮服闋陞洗馬旋授國子司業以疾卒於官璪居翰林二十年稱詞垣宗匠生平雅慕鑑湖高風更號鏡湖所著有鏡湖文集晁氏足徵錄卒祀鄉賢

張師伊

張師伊大名人少與申考功燧晁司業璪齊名勤學禋行相期以古賢聖之業俱登嘉靖庚子鄉書後申晁成進士有名乃益下帷發憤爲諸先輩祭酒竟阨

數奇歷任浮山項城浙川俱有聲遷黃州判無何卽  
致仕歸行李蕭然篋中惟圖書數十卷撫書而笑曰  
他人以金吾以今古賢聖歸所得豈不奢哉乃卽其  
故所居張家潭者構一室攤書籍其中朝夕遊咏絕  
跡城市暇則荷笠披蓑與田父牧兒坐茂林語桑麻  
若忘其爲張別駕也者當道高其風屏于旌往候者  
後先相望第祇一刺相答報已耳生平恬澹寡欲而  
畝有書癖所著有劄記詩文若干卷藏於家

李思孔

李思孔開州人嘉靖己未中禮部試卽陳情歸養壬

戊殿試授行人生平篤於倫理薄宦情翩翩自附於  
盛世之逸民焉卒祠鄉賢

吉 陳

吉陳開州人與弟陽同領鄉薦守河州遷趙鄭兩王  
府長史多所匡益 肅廟以鄭王直諫忤旨錮王併  
奪陳職陳歸田杜門子澄爲御史孫大同爲行人嘗  
歸省禁不得乘肩輿謁親故生平食不兼味一褐十  
年不易卒之日子澄以都御史侍孫已藩臬山東曾  
玄滿前含笑而逝傳稱其廉平如召杜忠懇如董賈  
表正如王彥方貽穀如萬石君殆實錄云

王光祖

王光祖字子孝大名魏縣人也生有殊質遊諸生間  
行甚著嘉靖癸卯舉京兆省試其明年甲辰第進  
士授夏津知縣以外艱去服除補陽信其治兩邑皆  
以行能殊絕課最東省遂召爲監察御史兩邑之民  
皆尸祝焉旣爲御史巡視都城以法繩貴疆不少假  
貸大將軍驚憚之謹飭門下毋犯御史出按遼左虜  
嘗一入塞將吏受指畫多所斬獲而以遼帥某不奉  
法上書劾其罪狀帥遂誅死故相嵩庇帥而心嫌之  
左遷汝寧知府會吳中有島寇簡二千石才者往則

調守蘇州未至而寇去吳轉掠江淮以北則調守登  
州光祖歷兩郡所在惠政流聞士民德之久之乃擢  
爲湖廣按察副使備兵辰沅再擢陝西右叅政分守  
涼州兩居塞徼威聲遠鬯蠻夷懷服是時資望益重  
稍遷卽至開府顧以母太孺人老家居不能從日夜  
念之數有歸志亦會爲忌者所中遂自免歸天性孝  
友內行淳和居官所餘俸入推以與弟不問出入曰  
以歡太孺人其贍施宗黨也族有義田里有義塾有  
倉以賑有域以藏魏人至今頌之

王永壽

王永壽魏縣人少與申考功燧劉貢士塘稱邑中三傑由歲貢登嘉靖壬子鄉試連不得志于禮部而其文益高行益苦兵部李公脉泉延爲館師時有大獄其家持二百金爲請託卽李公亦欲緣此濟其貧力謝不納家蓄一琴養一鶴每客至彈琴鶴卽婆娑舞堦下助客歡後一日鶴死爲瘞鶴文居亡何未病而化遺命以琴殉葬其生平高潔類如此

穆文熙

穆文熙東明人嘉靖進士少穎悟經籍無所不窺尤尚節義莊廟初給事石公星以言忤廷杖幾斃文



熙奮不顧身周旋醫藥得不死解官歸士論高之後  
歷官憲副浩然而歸所居有逍遙園坐起一編文藻  
蔚然爲一代名家所著有逍遙園集左史戰國纂評  
諸書行於世

晁東吳

晁東吳字叔泰翰林檢討璪次子也幼負奇質弱冠  
登進士選翰林庶吉士讀中秘書操觚翰雅追秦漢  
語耻與俗軌軒輊尤善搨古書法每自心得臨趙松  
雪書散置卷中明者莫能辨也在館中相劇切必曰  
強學慎行宰相以下折節與交比之黃叔度云咸以

爲卿輔不足爲而得年僅二十三耳當甲寅上書移疾歸遂以是冬卒檢討君大慟哭曰兒至性孝友不妄言笑卓然有當世志嘗觀時事非是爲之憤恤不食者竟日尋其端萌知其末緒斯非純碩而可以詣遠者耶手錄其遺文總四卷墨蹟一卷名之曰誠痛錄

丁蕃

丁蕃元城人嘉靖三十七年浙倭猖獗蕃與堂弟丁佃以精兵應募總督胡公宗憲命守定海舟山與賊截殺軍令退縮者面縛梟首佃退縮當斬乃號泣曰

死所甘心第佃有老母孀居又無兄若弟子呱呱在襁褓間柰何蕃聞之泣謂佃曰弟情良苦我有二弟四子死可代也遂自縛請代軍門悉其狀大義之乃網杖佃免其死逾年還鄉母得終養里人高其義聞於有司入旌善亭萬曆二十一年知縣李炳旌其門

王循吉

王循吉開州人潛心理學不事舉業齋居大成殿讀書十年註五經圖說獻 肅廟蒙 恩賞加處士號著憂世圖心法圖藏於家

盧學禮

盧學禮字立夫號趨庭自潞城徙家東明學禮少自  
異姿嶷然魁岸爲博士家言敏捷有法度博聞強志  
名稱超然隆慶丁卯舉京兆再上春官萬曆甲戌將  
復詣試而值母病或勸盍且趣裝愀然謝曰安有親  
卧牀簣而千里赴名有如闕于一訣何以爲子竟止  
不行頃之丁內艱丁丑北上乃成進士筮仕南召令  
踰年聲績大起銓部偉其才望奏改臨汾尋以外艱  
去服除補東阿浹歲召爲兵部武選司主事再遷車  
駕郎中擢兗州府知府復丁繼母憂服除補守襄陽  
會播州兵興供億徵輸多所勞瘁又以權使暴征爭

不能下方欲歸圖旋晉陝西按察司副使備兵洮岷  
聞命欲謝不往所知咸敦迫之爲一持節蒞鎮又與  
勅使爲忤竟拂衣歸歸不數月輒病病不踰歲竟卒  
學禮爲人貌樸而偉性坦夷無城府接人辭色雍雅  
情義藹然而凝重不佻口若鈍於辭然於世故民情  
談說娓娓曲中肯窾至竟日夜不倦居職廉儉無紛  
華爲政簡靜寬和挈綱踈目比讞精詳綜理縝密猾  
胥不能欺也事使之際不爲崖異而動有執持亦無  
能撓其法者蓋純然古循良吏矣南召僻小邑然在  
山谷陜塞中多曠盜學禮日夜拊循小民樽節裁省

與之休息因以嚴飭烽燧盜不得發境內無虞臨汾平陽所治煩劇爲尤學禮居是邑獨久外寬內敏不嚴而辦諸緣飾文具者不及也東阿號當路邑其繁不及臨汾其衝倍之學禮不滿朞月政通人和誦聲交作赫然最魯中充爲東方大府介在兩都之中最稱望郡學禮以三邑之政移之于守風聲所樹二十七城罔不蒸蒸如在宇下兩臺諸使以疏言治狀且十餘上銓部考其治績表爲關中憲副候命未下遂以憂歸再補而後遷位雖尊顯於學禮資地稱淹抑矣猶以不能爲容拂衣而老仕林惜之而里人當

學禮之卒識與不識皆爲歎息泣下至空市走弔則中心誠信所感矣

王一元

王一元魏縣人少與南樂魏考功允中俱受知兵憲鳳洲王公王公嘗會考十二學諸生拔居第一考功次之卽考功固自心服也由選貢登鄉薦潛心聖學有大學中庸主意膾炙人口生平不謁公府無私讌會雖望重一時罕有見其面者天性孝友家庭間恂恂有古人風族中死無棺者爲之殯貧無資者爲之養沒之日從容正寢囑其弟曰無求墓誌皆虛文祇

增不德耳魏人稱爲獨行君子云

魏允貞

魏允貞南樂人登萬曆丁丑進士授荊州府推官正值江陵柄政欲收之以爲用允貞兀然自立不少詭隨重懲其一二家奴江陵啣之密伺其短卒無所得後以政績卓異擬入省垣江陵改置臺中爲御史風裁大著歷山西巡撫右副都御史兵部右侍郎所在俱建勲名其奏議洞中石畫人人膾炙云

魏允中

魏允中南樂人總角時卽擅文譽且負奇節萬曆丙



子發解順天庚辰登進士第三甲第一人授太常博士時江陵勢熾方熾炙手可熱允中挺然以正自持絕不相附每每譏切時政張頗聞而恚之後遷吏部竟以憤悶不平抱鬱成疾卒於京有魏子集行於世

張 瓘

張瓘如宗孫也大名人家學克紹世德相承門閥雖甲邑中而謙冲和厚無忤於人卽田畔有見侵者每讓不較以歲薦分教祁庠繼掌教伊陽咸恪修厥職士習賴以振起晚歸林下舊地爲漳水所衝乃結廬

東圃居焉居近郡邑各三里許而足跡終歲不一至  
抱璞養靜里人高之初總角時已失怙恃兄嫂秉家  
政頗少恩及析產復以劣下者畀之皆怡然順受後  
諸任衰替周急扶危久而無厭壽踰八袞卒以孫崇  
功貴贈叅政

耿介

耿介元城人歲貢篤學礪行居喪三年酒肉絕不入  
口受百金之寄而不負所托周旅士之貧而不責其  
償義舉多類是教垂兩地德感諸生入蕭徐兩處名  
宦本縣鄉賢邑人進士董復亨撰高士傳以寄仰止

之思云

盧 柟

盧柟字少榎大名濟人也其先世業農穫則什一而息之故以貧雄於鄉柟少負才敏甚讀書一再過終身不忘父爲入貲太學上舍數應鄉試罷免歸柟才高好古文辭不能頰而就繩墨攻博士諸生業以故試輒不利而聲稱奕奕在薦紳間爲人跡弛不問生產時時從娼家遊大飲飲醉輒弄酒罵座母敢以脣舌抗者而又豪於詩當所得意下筆數千言立就客咸咋指遁去竟用是敗濟令某者數刻深名法家言

於文非能好也陽浮慕之以張吏術耳諸柎邑諸生  
才得從事幸甚柎亦欲借令謬恭敬爲相得極歡令  
嘗從客語柎吾旦過若飲柎歸與翁媪益市牛酒夜  
共張至旦室邑子相戒盧生有重客門之履相蹈也  
而會令有它事日昃不來柎愧且望之斗酒自勞醉  
則已卧報令至柎故徐出坐久之柎稱醉不能具賓  
主禮令恚去曰吾乃爲僮人子辱愧見其邑長者邑  
人素惡柎者爲柎讒曰是嘗見令君文而笑且唾令  
益怒亡何柎干拯其役夫得伏麥以爲盜也榜之役  
夫被酒自理而聲加強柎復加榜焉旬日役夫夜壓

於牆隕事聞令令色動曰噤纍是復能倨見我耶匿  
役夫所繇死復當柙抵坐獄具上報可柙旣已坐大  
辟繫獄又令仇之故毋敢爲稱寃者而會柙鄉人間  
嘗侍飲不遜柙目攝之來爲獄吏夜縛柙格箠之數  
百臀腫悉潰爛且死矣吏以他事罷得不死乃感慨  
折節益讀其所携書著幽鞠放招賦以自廣其幽鞠  
曰盧柙旣用事逮繫濬獄與幽囚伍脊憤迷惑目無  
日月不知晦朔仰天太息曰嗟呼聖人修身晉道立  
命不貳賢者推運循理以定所天顧柙微眇離茲憲  
網問諸造物而已因作賦以自廣其辭擬離騷又著

放招文俱有深情麗語居頃之盜行剽迫柙父自剄  
死燒其廬子錢家咸負貸不償柙固已壁立矣令亦  
更悔念魚肉盧生何酷耶陰稍稍寬柙予酒肉食飲  
洗沐尋令去事益解而故人謝榛者携柙賦游京師  
貴人間絮泣曰天乎冤哉盧生也及柙在而諸君不  
以時白之乃罔罔從千古哀湘而弔賈乎陸光祖吳  
人有心計俄謁選得濬令至則首爲更爰書上論鬼  
薪輸作三歲盧柙旣出獄家益貧乃爲九騷謝陸令  
而謝檜方留滯鄴柙走謁之因上賦趙王趙王覽而  
奇其文立召見賜金百鎰於是諸王人人更置邸延

柎柎則稱客坐右坐握麈尾辨說揮霍數百千萬言  
風雨集而江波流也鳴毫颯颯倏忽而爲辭若賦各  
得以意去旣酒醉故態畢發罵其坐人則人人掩耳  
走避柎竟亦不自得罷還顧橐中所餘金幾何趣付  
酒家也婦囁嚅咎柎不顧曰天生盧柎爲女曹地耶  
吳人王世貞治獄大名飛書大匡山中勒邑吏具筆  
札受柎所著集若干卷柎故亦慕稱世貞嘗爲文托  
謝檜致之不達至是見世貞郡臺把臂爲布衣飲三  
日酒語慷慨恨相見晚也旣以別世貞去南游金陵  
陸光祖爲祠部郎留月餘走越歷吳母所遇還益落

魄嗜酒病三日卒

李化龍

李化龍號霖寰長垣人萬曆甲戌進士授嵩縣知縣  
陞南工部主事歷郎中陞河南提學僉事轉叅議遷  
山東提學副使叅政河南晉太僕少卿遼東巡撫乙  
未陞右都御史兵部右侍郎回籍調理以楊首倡  
亂爲總督川貴湖廣巡撫四川經畧播州摠八路  
兵將征勦播平丁憂服除起右都御史工部右侍郎  
總督河道丁未陞少保兵部尚書協理戎政巳酉回  
部管事考滿加少傅兼太子太保辛亥十二月卒贈



太師剔歷中外動著勲猷卒能保全功名仰膺  
眷于一時稱巨擘云

人物考卷之十一目錄

南直隸應天府一

陳遇

附子恭

端復初

子孝文

孝思

孫炎

周禎

僕斯

杜環

王元吉

齊泰

巫凱

張益

曹義

王一居

張俊

倪謙

張欽

丁璿

楊洪

凌錦

金潤

張瑄

楊能

附弟信

顧儼

童軒

樊繼

盧廷佐

金紳

陳遠

本朝京省人物考卷之十一

南直督學御史西浙過庭訓纂

門人蘇松備兵副使南郡熊膏叅閱

男 過銘盤

過銘孟

過銘簞

寧國府學生員嚴弘志全訂正

南直隸應天府

陳 遇 附子恭

陳遇字中行先世曹人高祖義甫宋翰林學士徙居

建康子孫因家焉遇資稟純粹識度超遠博通經史  
尤邃於先天之學元末爲江東明道書院山長開教  
永嘉子弟多從之及中原板蕩乃歸建康扁所居之  
室曰靜誠人因號曰靜誠先生 太祖高皇帝渡江  
御史秦元之薦遇學行才識因以書聘之旣見與語  
大悅遂命籌謀帷幄益見親信幸其第者三甲辰  
上卽王位賜冠帶授供奉司丞不受 上卽帝位遇  
陳治道以復中國先王禮教爲首務三授翰林學士  
皆不受乃賜肩輿一乘選衛士十人贊其出入洪武  
庚戌春承命往兩浙廉察民隱還朝密有所陳賜白

金綵段除中書左丞力辭辛亥召對華蓋殿賜坐命  
草平西詔賞賚有加授禮部侍郎兼弘文館大學士  
復辭時西域進黑馬一匹甚奇召入看遂引漢故事  
爲諫 上大悅賜大銀一錠除太常少卿又辭 上  
不許沉吟良久從之會疾醫藥<sub>不效</sub>至疾愈入謝 上  
望見連呼君子君子戊午復除禮部尚書又固辭  
上曰士之有志節者功名不足以介意其卿之謂乎  
朕不强卿以成卿之名也自是每燕閒輒召問古今  
得失嘗值暑賜歸時功臣少有過譴遇力爲救解多  
所全釋 上嘗諭曰先生有子着來帶刀隨侍朕當

重用對曰臣三子皆幼俟其讀書成立以圖補報  
上悅賜織衣兼金當是時寵遇之隆雖公侯卿貳無  
與比者甲子秋病作尋卒 上震悼不已遣中官諭  
祭加東園秘器賜葬鍾山祖塋之次 上所賜詩文  
翰墨甚多并遇所著述嘗燬於火故所存無幾今見  
世德錄云子恭由鄉貢仕至工部尚書文章政事克  
世其家

端復初

附子孝文孝思

端復初字以善姓端木氏其先爲衛人出子貢之裔  
今獨以端稱氏者省文也三遷於溧水縣巉山復初

幼有遠志不肯寂寂落人後至正初以儒試吏江南  
行御史臺同列多貴遊子弟爭事表襮獨泰然不失  
其恒行人咸畏服之俄遷書吏佐部使者行州縣彰  
善癉惡聲獨著聞會四方兵動東南爲尤甚袖策言  
時政之急如此則可守如此則可戰否則有歛手就  
降而已上官聞之皆落落不合仰天歎曰彼以吾發  
狂言耶時事從可知矣於是悵然有鄉土之思溧水  
道絕不能歸僑居金華以書史自娛至正己亥 皇  
上親御六軍取金華命常忠武王鎮之聘至幕下未  
幾辭去會有言於 上者召爲徽州府經歷徽爲江



東大郡政繁而賦殷悉力佐治百廢具舉功則歸於其長田賦久不均民不堪命卽城東建局使民自供集爲圖籍覈盈胸驗虛實而定科徭吏民陰爲欺弊痛謫之不數月而畢由是民無逋租官無橫歛時孔子廟廷久圯葺建之咸中程式賦不及民若不知者丙午冬改通判吉州府吉俗尚譁訐素號難治至則召父老子弟戒之曰余聞爾民尚豪侈樂訟鬪朝廷子惠元元春雨秋露無不霑濡爾曷爲良民以報上德寧梗化以自戕耶梗化弗祥天刑所不貸爾其識之民皆惴惴無敢執牒妄訴者丁內艱服除洪

武辛亥春被召赴京除磨勘司丞時官署新立凡錢粟之出納刑法之是非貨物之變易無所不讞從本達支自流徂源勾稽隱伏纖芥軒露每一奏對上輒廷譽之未幾陞爲令復初嚴於限域人見輒畏不敢有所請托俄僚屬皆以貪墨敗牒藁首東市惟復初清白之行表見朝署冬十一月超授嘉議大夫刑部尚書其用刑本諸法律而持以平恕老於議法者咸以爲允當杭州馬甲飛糧事覺逮繫者百餘人詔往治其獄分羣囚別所人各鞠之合其辭叅焉同多者情真否則僞郡守以下皆服罪壬子春三月拜湖

廣等處叅知政事階中奉大夫湖廣素號重鎮屬兵  
戈蹂踐之餘土曠民稀首下屬州民復業者復其賦  
一年次閱官書凡糧儲轉輸錢幣出入與夫軍裝工  
役皆預爲計畫且會官屬問事不集者其故何繇皆  
曰一省所轄府州縣二百有餘遠者在千里外每官  
多闕事因不集因奏請於朝擇在職賢良吏攝其政  
不數月無事不舉民驚以爲神旣而以事召還京師  
俄以疾卒居官能厲操守貧嘗著座右銘曰心契上  
天脚踏實地故翰林學生朱昇謂其謙退似懦夫其  
專謹似腐儒瞻視精悍似俠客掀髯談世事似辯士

而其精神超越又似逸民隱者人謂爲實錄云子端  
孝文次子孝思皆以儒士起家孝文爲翰林待詔孝  
思爲翰林侍書先後使朝鮮以清節爲遠人所服立  
雙清館旌之

孫炎

孫炎句容人長身跛一足博學善辯論長於歌詩本  
朝初建炎疏請延攬英才以圖大業後征浙東以功  
授處州總制措置有方境內皆服後爲賊所執脇使  
降炎大罵不屈賊怒拔刀叱解衣炎曰此紫綺裘君  
所賜者我當服之以死賊遂害之追封丹陽男

周 禎

周禎字文典江寧縣人元末兵起流寓江湖間庚子年王師平僞漢入仕擢江西按察司僉事吳元年陞大理寺丞本年陞大理寺卿十二月詔禎同省臺李善長劉基陶安定律令禎上疏曰立法貴在簡易使人易曉若條緒繁多或一事而兩端可輕可重奸貪之吏得以夤緣爲奸則所以禁殘暴者反以賊良善非良法也 上嘉納之洪武元年八月設六部陞刑部尚書本年改治書侍御史及建廣東行中書省除叅知政事開省之初州縣正員多缺廣州香山縣縣

丞冲敬經營廨宇百務悉辦流移四集狂寇倏至  
率民捍禦寇乃遁去縣民賴敬以安竟以勤死禎至  
卽具文祭之雷州同知余騏孫及揭陽縣丞許德增  
等皆能吏也悉上其績纖善必錄 上嘉納之會下  
詔開科禎豫聘名儒以待考試洪武二年復召禎爲  
刑部尚書三年以年老乞致仕

僕斯

僕斯溧陽縣人故元嘉定州知州來附王師洪武元  
年授兵部員外郎本年擢尚寶符寶郎二年高麗遣  
使上表來貢方物遣斯賞印封之改尚寶司丞仍以

祝文牲幣祭其境內山川使回稱 旨日侍左右四年出知太安州六年陞河間府知府俱以才幹著而民亦不擾九年入爲戶部郎中尋陞戶部尚書本年調山西左叅政十三年正月召拜吏部尚書二月改禮部尚書三月詔定公侯稱號 上諭斯曰自今封公侯不必加以散官已授券誥者且仍其舊若追封公侯生則曾佩將軍印者仍列於銜於是斯等奏定則式爲三公侯之銜曰開國輔運推誠宣力武臣某公某侯食祿若干石世襲者曰世襲某公某侯食祿若干石追封者曰開國輔運推誠宣力武臣某追封

某王某公謚某本年以年老致仕

杜環

杜環字叔循金陵人環博通經史長於翰墨其書法端妍至於行草亦各臻妙歲丙午太學初建環以儒士被薦除學錄以書法示六館之士命皆倣而式之尋入侍春坊大爲皇太子所眷時天下以工書名者皆被徵而至然流輩中罕見其比焉故環之書名騰京師學士大夫有所述作借其書以取重洪武改元遷太常贊禮郎後爲晉王府錄事終太常寺丞爲人謹飭重然諾好周人急父友兵部主事常允恭死



於九江其母張氏年六十餘哭九江城于無所歸有識允恭者憐其老告之曰安慶守譚敬先非允恭友乎盍往依之母如其言附舟詣譚譚謝不納母大困念允恭嘗仕金陵親戚交友或有存者庶萬一可冀復哀泣隨人至金陵因訪一元家所在道上人對以一元已死惟子環存母服破衣雨行至環家環方對客坐見母大驚因問曰母非常夫人乎何爲而至於此母泣告以故環亦泣扶就坐拜之復呼妻子出拜妻馬氏解衣更母濕衣奉糜食母抱衾寢以待母問其平生所親厚故人及幼子章環姑慰之曰天方

雨雨止爲母訪之苟無人事母環雖貧獨不能奉母  
乎且環父與允恭交好如兄弟今母貧困不歸他人  
而歸環家此二父導之也願母無他思時兵後歲饑  
民骨肉不相保母見環家貧雨止堅欲出問他故人  
環令媵女從其行至無所遇而返意乃定環購布帛  
令妻爲製衣衾自環以下皆以母事之母性褊急少  
不愜意輒詬怒環私戒家人順其所爲勿以困故輕  
慢與較母有痰疾環親爲烹藥進匕筋以母故不敢  
大聲語越十年環以贄禮郎奉 詔祠會稽還道嘉  
興逢其子伯章泣謂之曰太夫人在環家日夜念少

子成疾不可不早往見伯章若無所聞第曰吾亦如之但道遠不能至耳環歸半歲伯章來是日環初度母見少子相持大哭環家人以爲不祥止之環曰此人情也何不祥之有旣而伯章見母老恐不能行給以他事辭去不復顧環奉母彌謹然母愈念伯章疾頓加後三年遂卒將死舉手向環曰吾累杜君吾累杜君願杜君子孫咸如杜君言終而絕環殯而葬之歲時常祭其墓學士宋濂爲環傳其事云

王元吉

王元吉字國祥少而重厚好問學英拔奇偉喜讀兵

家書輒以其意爲人言之人笑其過亦復笑曰子何足聞此吾誠過也年十四歲饑與兄行糶旁縣道遇盜利其粟將劫之兄懼走匿元吉不爲動徐給罵曰庸縣官使吾運粟許遣夫防我而不至若豈防夫耶後有粟車數十輛若其防後至者盜以爲然散去里中長老固已異之後大夫福壽在金陵盜陳也先潘甲率兵數千自稱爲元帥聲言討賊索軍食城下大言殺人守將閉門伏不出大夫憂不知所爲元吉造門論以禍福說累百千言驚其座人大夫亦驚喜起問計元吉曰今城中無一軍而盜兵甚熾此難

與爭鋒當以計破之盜索芻粟公宜開城門陳芻粟車若將饋之者而陽以好言給之請一元帥以卒來取芻粟彼聞吾言不測吾淺深兩人必相讓則主者必自來吾以計殺之而制其一人易矣大夫從其言既而潘甲果至執殺之也先失勢亦自敗去匿其事絕不以語人去而之燕秦齊魯之間陰察諸藩皆不足與言復歸金陵而 太祖已得江淮卽金陵爲帝都鄉間子弟多致大官元吉嘆曰人主在吾鄉而吾求之天下吾之命薄明矣尚多談何爲因噤不更談世事隱醫肆中自給剗落距角不露幾微故習恂恂

務爲訥樸事父孝謹友其兄恭遜與衆人處不求其異人莫知其爲奇杰士也卒以布衣終年三十有九耳爲人敦風誼知好尚當世名士多喜與交父喪致客千餘人挾其所長嘗以自高而人莫能高之齋志以歿悲夫

齊 泰

齊泰溧水人初名德洪洪武二十年鄉貢明年舉進士歷禮兵二部主政會雷震謹身殿 太祖禱郊廟泰以官九年無過得陪 祀賜名泰三十年陞兵部左侍郎明年進本部尚書 上嘗召泰問邊將姓名

泰歷數無遺又問諸圖籍泰出袖中手冊進簡要詳  
密 上大奇泰是年閏五月受顧命輔 皇太孫時  
諸王皆尊屬擁重兵專制地嫌勢逼詔諸王臨邸中  
毋奔喪王國所在吏民悉聽朝廷節制詔下諸王不  
悅謂此齊尚書間我也 成祖自燕入臨至淮安泰  
上言急出勅符勒歸國又與太常卿黃子澄建策凡  
親主罪輒除國泰欲先圖燕子澄不可建文元年北  
兵起泰專主籌畫命將帥部師旅闡外之事一以付  
之泰遂移檄指斥削其屬籍北兵以誅泰爲名泰以  
谷王穗漏師遁還又慮遼王寧王近燕爲變皆召還

寧主竟不至使李景隆將兵北伐泰極言其不可任  
三年北兵日進逼淮泗謫泰與子澄官求解兵景隆  
致書謂齊黃屏竄遐荒可息兵歸藩 成祖曰此緩  
我也不聽進兵益急尋召泰未及還而金川門已開  
建文君遜去泰追至廣德欲往他郡起兵興復被執  
見 成祖不屈死之藉九族 仁宗時泰等宗黨皆  
得赦還給其田土嘉靖中特祠以祀

巫 凱

巫凱句容縣人國初從征有功累陞都指揮同知永  
樂元年調遼東都司宣德元年陞都督僉事佩征虜



前將軍印充總兵官鎮守遼東以功陞都督同知正統三年卒賜祭葬凱性剛毅饒智略馭衆嚴而有恩在邊三十餘年威惠并行邊務悉舉人謂前後守東陲者莫能與凱並云

張益

張益字士謙先世姑蘇國初徙閬右實京師遂爲江寧人益儀觀豐碩讀書過目輒成誦甫成童爲文辭咄咄逼人登永樂乙未進士選翰林庶吉士授中書舍人宣德初預修文廟仁廟實錄成賜白金彩幣進修撰以博聞強記見稱九載進侍讀學士尋召

入內閣叅機務日見委任賜繡衣金帶建第鎮淮  
南寵之是歲八月會虜警中人王振力主親征益與  
學士曹鼐從時西寧侯宋瑛武進伯朱冕已全軍覆  
沒力勸上由紫金關以還行四十餘里忽折而東蓋  
振勸以從居庸也十三日駕至土木地無水又當虜  
衝明日欲發兵士饑渴束手虜騎蹂陣而入奮長刀  
以擊我軍衆相蹈籍死 上與親兵乘馬突圍不得  
出虜擁以去而益與鼐俱沒虜中矣年五十有五旣  
而朝廷錄死事之臣特贈翰林學士謚文僖遣官祭  
於其家益才甚敏捷好圍碁求文者敦迫輒令侍書

持軸舉筆一揮詞翰雙美人以文豪稱之孫琮官至  
右都御史

曹義

曹義字子宜句容縣人自幼凝重穎敏父奇愛之異  
於諸子遣爲邑庠生誨之曰吾家世業儒汝事學毋  
怠以底於成巳丁嫡母憂服闋見同門多成就遂奮  
志讀書晝則閉戶夜則隱燈於帳臥讀雖隆冬盛暑  
不少解永樂九年以書經中應天府鄉試卒業太學  
選入翰林讀書益自淬礪肆力於學登永樂乙未進  
士尋改庶吉士先是宅旁有一背井殆百餘年泉湧

出鄉人以爲兆義之興云歲戊戌授翰林編修丁生  
母吳氏憂喪制未終 詔奪情蒞職秩滿轉禮部儀  
制司主事仍直翰林未幾丁父憂服闋還官宣德乙  
卯陞吏部文選司員外郎正統癸亥知者薦爲浙江  
叅政 上特留之明年陞文選司郎中又明年陞吏  
部右侍郎義盡心率職品量人物鮮有不當時泰和  
王直爲尚書以義精選法凡黜陟賢否一以托之義  
事王甚謹於事可否非經咨決不輒行以故王待之  
益厚嘗密謂人曰曹公端人也巳巳秋北虜犯京師  
奉 勅提督官軍守衛正陽門晝夜不遑寧處防範

嚴謹虜不敢近尋轉左侍郎時當多事之秋屢有建  
白具見諸施行景泰改元陞南京吏部尚書天順紀  
元年七十有二捧賀表自南京至上念義累朝舊  
臣而年且老特賜致仕 賜璽書有典選著公平之  
譽議事有忠讜之言之褒家居四年而卒義寬厚周  
慎不與物忤人有過必導以巽言不事訐直居官行  
已一以忠勤謙慎爲本不矯飾以取名譽外若渾涵  
而中有定見少師楊士奇素不輕接人然最愛重之  
每與商論人物別白賢否必據其實有不協者反覆  
不已楊樂從之尤篤於友義編修邢譽卒而家甚貧

哭之盡哀且買棺殮之并賻以白金其子鴻臚序琰  
純聘而未娶復助貲以婚隣有竊其屋後木者家人  
踪跡知之且詬且索乃止之曰彼乏用故取之勿再  
言也其仁厚不校類如此治家甚嚴訓子姓亦必以  
正道子冕爲中書舍人兄子景第進士爲監察御史  
每誨景及冕以務忠孝慎交際且曰爲人宜寡嗜欲  
立心宜以不欺爲主慎勿習奢侈夸誕也吾平生無  
過人者惟此心不欺物不暴殄耳及致仕家居悉屏  
世務於屋東闢地種竹鑿池畜魚構一亭於池上其  
傍雜植以花果題曰怡老日與騷人墨客飲酒賦詩

以爲樂識者慕其高致云卒年七十有六所著詩文  
有默菴集藏於家

王一居

王一居上元人讀書樂善永樂中擢太常贊禮郎宣  
德元年有事南郊朝廷嘉其禮度醇雅典故詳明特  
遷太常寺少卿正統土木之難沒於軍景泰初贈太  
常正卿

張俊

張俊字俊民江浦人自幼聰敏好學弱冠爲縣庠生  
讀書作文名出儕輩上會朝廷修永樂大典徵羣儒

集館閣俊以能書與焉書成入太學擢爲左軍都  
府都事剛毅嫉惡不可以勢撓都督薛祿有嬖吏王  
羅者母喪匿不發而歌呼飲酒自如俊曰違天逆理  
莫有甚於此具以聞羅由是得罪然亦不爲有勢者  
所容未幾誣以事謫保安十年恬然自處未嘗有幾  
微不足意久之祿以功封陽武侯總兵鎮北邊人皆  
疑將構之曰羅獲罪於天天道所不容薛公國之大  
臣豈以私嬖讐天平吾無所患也旣而薛公乃遣人  
邀俊計事語皆合意卽留置幕府將奏用之適 詔  
下求賢御史李驥薦俊授德清知縣德清浙劇邑也



俊一見士民皆能記其姓名人謂其聰察若神不敢欺縣積逋稅累數萬凡十餘年不能足設方略徵之不暮年皆辦是時使者假公事行縣以苛酷取財民不勝其擾令以下聞風多避匿而擾愈甚俊聞其且至曰民恃我以安我先避匿民將何恃獨治事如故使者亦聞其名不復肆縣人賴以安皆德之藩憲大臣亦每稱俊以勵諸邑德清民富而不喜學知富民子姚朝宗質頗秀敏欲遣入縣庠其家夜懷金賂以求免俊曰吾欲得人教之以備朝廷任使豈假此求賂乎聖人在上吾不如是也卒以補學官弟子民有

許三者嘗陰伺官府動靜爲姦屢恣暴橫昔爲縣者  
不敢校廉得其實奏之流徙遠方一邑稱快俊輕財  
重義有貧不自振者雖倒囊與之不少靳故人李東  
素廉介欲爲子侃娶婦而無貲卽以女妻侃且戒女  
孝敬盡婦道其於諸子尤篤意教之不使佚游嬉慢  
出理政事夕歸課其學業以爲常正統丙辰罷歸優  
游自適者凡十三年以疾卒享年六十有七子瑄登  
進士爲刑部主事壻李侃與瑄同年登第爲戶科給  
事中

倪謙

倪謙字克讓別號靜存其先浙之錢塘人洪武初徙  
實京師占藉應天之上元生有異質雙目炯然如電  
體有四乳性極穎敏書一經目卽記不忘補應天府  
庠生文名大著時初設提學憲臣監察御史彭公勗  
名知人巡歷所至輒舉以勵諸生故就試京師者爭  
求識其面領正統戊午鄉薦己未進士第一甲三人  
拜翰林院編修入讀中秘書己巳奉使朝鮮有乞詩  
文者卽席揮灑略不經意莫不驚以爲神至今國中  
梓行其文景泰間直文華殿每承顧問有裨時政應  
制賦詩中官立候以進天順初累遷至學士簡侍

憲廟於春宮日進講讀多所啓沃己卯主考順天鄉  
試斥黜權憲之子遂誣構以罪論戍開平在謫四年  
悠然以詩酒自娛邊人愛慕奉所親士子及門授經  
者多所造就至今科第不乏實有功焉 憲廟踐祚

詔復舊職尋與其子編修岳同日奉命入史局纂修  
英廟實錄時以爲榮進禮部右侍郎轉南京禮部  
進本部尚書以疾乞致仕卒贈太子少保謚文僖勅  
葬城南新亭鄉之原平生德量寬洪與物無競其與  
人交誠信無僞恒喜獎拔後進不遺故舊博覽載藉  
閤中肆外人莫能及而勤敏嗜學至老不倦才識超

邁用無不宜子孫衣冠之盛遂爲南都第一世以爲  
盛德之報云所著有玉堂稿上谷稿歸田稿南宮稿  
遼海編藏於家

張 欽

張欽世襲留守右衛指揮僉事欽年尚少屹有壯謨  
正統辛酉從征麓川賊黨有刀門棒刀門顛兩酋者  
極勇黠欽連斬之進攻上江拔孟抵招罕諸砦王忠  
毅奇其功承制進都督僉事時諸軍自杉木籠山進  
圍麓川欽率偏師潛入其中堅賊帥思任發大感走  
緬餘衆悉降凱還得世襲指揮使癸卯命理中都留

守司事戊辰詔以所部從寧陽侯討閩寇鄧茂七以  
功進都指揮同知景泰庚午再從入閩殲賊孽於延  
平壬申進都指揮使尋署僉後軍都督府事天順元  
年命鎮守延綏慶陽諸路抵鎮之明年虜酋孛來入  
寇出兵禦於柴溝斬獲甚衆捷聞賜白金綵幣進都  
督同知專守延綏西路虜以前不得志復入寇安邊  
營欽分道拒之連戰於野馬澗俘斬擒獲更倍於柴  
溝特勅褒諭命佩靖虜副將軍印總延綏慶陽諸路  
兵成化乙酉召還理中軍督府事欽出入兵間首尾  
三十五年自諸衛歷兩府功與能可謂無媿矣年七

十一卒五遣禮部諭祭特贈左都督命工部給喪費

丁璿

丁璿字仲衡上元縣人祖父世爲農璿生周歲失母十三喪父鞠於祖母馮自少卽知樹立言語動止儼如成人每泣語人曰我幼不能養親長猶可以顯親因入應天府庠補弟子員年二十二以明經領鄉薦登進士第改翰林院庶吉士尋授工部主事謫戍盧龍久之用知者薦授山東道御史巡徐州使雲南所至歷著聲績宣德乙卯賊首張晉祥作亂璿設策捕獲之正統戊午盜起衛輝劫掠居民璿復承命往捕

縛其渠魁餘盡釋令復業一境以安 英宗嘉其能  
陞右僉都御史勅同豐城侯大同宣府督運糧儲時  
麓川蠻叛官民戰失利召璿馳驛往視之至則會太  
傅黔國公議用兵便宜十餘事以聞仍勅巡撫雲南  
兼饋餉尋以征麓川功陞右副都御史兼巡貴州正  
統戊辰年六十七乞致仕得旨未行以疾卒卹典有  
加璿爲人寬厚簡重自幼嗜學篤於踐履及入官公  
餘猶手不釋卷取歷代名臣行實手錄之以備觀省  
所著詩文奏疏甚多皆不留稿謫潞河十餘年絕意  
外慕御史張政過其居適邏者來報聞公失寢今獲



盜者需公認璿曰吾家未嘗失彘辭不往政問故璿曰時禁盜者死寧忘吾彘不忍其死也張歎曰公仁人也因薦起爲御史巡陝西時有行人被酒入察院侮罵臬司皆不平請劾奏之璿曰是醉耳不足較也明日行人果請謝璿德量弘雅真不愧古人矣

楊 洪

楊洪六合人祖政世百戶洪嗣官調開平機變敏捷善用計出奇兵擣虛累功陞都指揮正統間 上每舉洪功以勵諸將洪益自奮守邊屯營專用鐵蒺藜禦敵尋以都督守獨石敗虜於大石門寶昌州捕虜

阿台打刺等斬首功二百正統十三年封昌平伯  
總兵鎮宣府虜畏之呼楊王而不敢名十四年虜犯  
京師洪與孫鏗范廣等率兵一萬擊虜涿州等處遂  
至固安大捷捕虜阿歸等四十八人斬首功四百餘  
邀還俘掠人萬計馬牛弓刀等萬數隨進侯封至景  
泰二年賜世券還鎮宣府卒贈穎國公謚武襄洪紀  
律嚴明將士用命敬慎自持不敢專殺也先之難奮  
不顧身轉戰千里一時諸將洪功爲最卒子傑嗣侯  
傑上言臣家一侯三都督諸蒼頭得官旗者十六人  
乞停蒼頭之官秩未幾卒傑庶兄俊嗣侯俊先以擒

卷十一  
二  
叛者喜寧功陞都督

凌錦

凌錦字日章句容人也父天壽永樂初以誑誤戍興州家業中圯獨撫錦而語之曰吾平生所爲無媿心者將恃爾以亢吾宗無自棄也錦受命感奮思以自効宣德初代父軍中騎射之餘時從儒者問書史大義而於一切世態俛仰宦跡通滯物貨奇贏悉鈎探其情勢而欲手操之性沉鷲有術長身偉髯慕古策士亦每以策干時名公卿諸公亦多折節與還往正統中從大將軍擣虜於甘州兀魯乃歸上言興州官

軍當分番宿衛而地遠外非便兵部是之得旨許內  
徙隸忠義前衛已巳秋虜大入寇京城戒嚴錦從副  
將軍戰虜彰義門大追虜紫荆關以功授試百戶景  
泰初貴州苗作亂錦在行破其香爐山諸寨進副千  
戶金齒守將知其能請隨以自輔天順元年正月以  
遞奏入京預迎 英廟復位進指揮同知食祿錦衣  
衛 英廟亦識其人數有賜齋詔乘傳取馴象於雲  
南還奏稱旨久之曹石擅政陷文臣典兵者謫調涼  
州明年與邊將出禦虜敗之功未上值 英廟燕間  
忽思錦問所在左右曰在涼州卽日召之時方革迎

駕功兵部以錦名劾奏 英廟曰非也仍舊職不問  
錦感 上知遇脫險卽夷遂以老疾自免日與方外  
者遊而於世故亦未始相忘聞朝政闕失暨邊報民  
瘼與客疊疊說不倦自號無默子放遊江東西淮海  
間十餘年乃還買西山田三百畝以濟饑捐地以瘞  
貧死者築大第作精舍壘山種樹日坐臥其中雖事  
聲色而所食無珍味所服不過唐巾氅衣自以爲得  
異人授金丹訣恒自闕不以告人也又時操觚著書  
以仙自命弘治壬子忽得疾不起享年七十有九

金潤

金潤字伯玉靜虛其號也世居錢塘國初以閭右實  
京師占籍上元潤生器識穎敏甫髫鬣教之詩書應  
口成誦年十二從其父遊華陽洞索紙賦詩人以神  
童目之尋充郡庠弟子員銳志經學正統戊午登應  
天府鄉解春闈卒業胄監授司務兵部以宏才雅操  
爲大司馬于公謙所器重凡軍國大計所言屢中事  
機有言赤斤蒙古地產異物可資軍用者議欲取之  
潤言昔有小校顧誠者因凍餒嘗獻其伎遣用於邊  
主將失卹誠亡命佗處乃盡以中國伎誨夷狄貽患  
非細奈何啓其端也事遂寢已巳春見北虜瓦剌勢

熾潛謁于公曰閩寇鄧茂七不足慮可慮者瓦刺也  
秋必入寇宜預防之是秋虜也先犯邊車駕將親征  
潤白卿公曰小虜不足煩 聖躬盍一言 鄺公愕然  
曰事急矣奈何遂率諸司聯章上陳不報未幾將臣  
失律 馮留虜庭京師戒嚴公卿相向而泣潤白于  
公曰大丈夫臨危授命正在今日豈徒自經溝瀆耶  
當獎率忠義之士養銳詰兵堅壁清野以待之使彼  
進不得 退無所掠不數日當遁去矣于公收淚謝  
之於是召募義勇數萬人以守虜入知我有備果遁  
去有言置藥水草中可毒虜衆人馬潤白 祖宗以

天地之心御四夷虜猶背德寧有藥毒可以禦侮耶  
不果行于公問守衛大明門欲請聖木刀爲杖如何  
潤曰刀劔用金利器也今用不利之器守衛可乎于  
公卽奏閱武庫取國初兵器用之自是軍容復振明  
秋虜服罪奉 駕還京羣臣出迎或疑虜有變趨起  
不敢進者潤曰主憂臣危臣子於君父所在可畏變  
耶遂出迎拜未幾擢知南安府潤往竭心郡事凡興  
學勸農省刑薄賦養老尊賢以至樹蓄溝洫之務靡  
不修舉先是境多虎害潤移檄城隍神俄一虎自投  
檻中羣虎屏迹不踰年境內大治民愛之如父母九



載秩滿當遷民無老稚咸遮道攀轅留之吏部考最將膺大用時潤子紳已成進士仕刑科都給事中歎曰仕宦貴知止足吾有子行吾志矣吾其歸乎輒懇乞致仕時春秋方六十有一給事爲構保節堂蒲石軒洞天清賞及永貞別墅歲時偕卿大夫捧觴上壽以爲慶鄉人榮之無何紳歷官刑部侍郎病卒而孫麟壽復舉鄉貢進士孝養備至潤日與賓從娛樂忘其年之已耄也弘治癸丑疾作一日起坐賦詩如常俄整衾熟寐而卒享年八十有九天性孝慈胸次高朗澄徹端居一念可對神明其視得喪榮辱若寒暑

代謝於前而心不少動待人以誠喜接引士類雖高  
年猶清談疊疊不倦興至輒鼓琴賦詩嘗製伊尹操  
以况其志時或寓筆山水間天機所到咫尺萬里人  
皆寶之涉獵六籍子史傍及天官地志兵法聲律醫  
卜之學靡不究而通之所著靜虛稿外稿南山十秀  
集凡若干卷文章冲澹雅則有古作者風尤邃於易  
嘗畫圖爲解及著淵學探微十二卷推明造化人事  
之迹鈎玄闡秘殆有功於康節邵子云

張瑄

張瑄字廷璽江浦縣人正統壬戌進士甲子授刑部

四川司主事戊辰以外艱去辛未服闋補原職轉員外郎郎中癸酉陞知吉安府吉俗素健訟日不下數十百人瑄決斷如流屢辯疑獄痛革吏弊發奸摘伏如神丙子夏郡大饑發廩賑濟賴存活者甚衆郡諸生匱乏者分俸給之建閣以藏御書建祠以祀忠節文廟府治橋梁道路盡爲修葺公私一新時巡撫都御史韓雍氣焰烜赫郡邑望塵羅拜瑄不爲屈天順庚辰遂由郡守陞廣東右布政使去吉之日老稚扳留不獲因建亭刻石以圖不朽及至廣會廣西流賊越境攻破屬邑瑄督官軍擒斬賊首築城堡改邑治

民賴以安賊轉嘯聚於陽江縣黃江屯歲久道路不通頑民鄧李保糾結流賊殺害良民逋負糧差者幾二十年官不敢詰皆勦除之躬督各屬造預備倉修理陂塘圩岸修築廣州新會等府縣城垣俱因民利而利之無一怨者戊子轉左布政己丑冬滿九載當赴京軍民千餘奔走乞留於是巡撫鎮守交章乞留以慰民情 詔可其奏壬辰陞右副都御史巡撫福建初所屬郡縣多無糧儲命各建倉廩勸富民出粟以備凶荒至今賴之沿海官軍先因事減支俸糧三十餘年遂以爲例瑄令仍舊支給官軍感惠立石頌

德閩安鎮出海有二港勝國時有鐵索橫絕港口以禦海寇歲久廢沒因命所司重造鐵索長百有餘丈兩岸維以鐵樁中以船二十隻駕之小港如大港之制由是海寇絕跡不敢往來山海寇林壽六等攻劫鎮城歲久不獲瑄至盡皆成擒福安壽林等縣地鄰江浙強賊羣聚阻塞道路計擒賊首餘黨盡散朝廷勅諭有處置得宜之褒鎮守太監盧勝暴橫瑄裁抑之事聞革去鎮守人民稱快甲午秋奉勅巡撫河南風紀益振乙未以例入京議事因奏時宜若安插流民責成守令修舉武備甄拔滯才等一十八事該部

皆議行之河南大饑發廩賑濟仍設粥以給饑者出  
衣布以給寒者全活不啻萬數戊戌改南京刑部侍  
郎累歲繫逮罪囚不旬月間各得其情問擬如律自  
是獄無冤滯壬寅以九載滿赴京陞本部尚書時南  
京御史何舜賓等坐贓犯罪徽州富民許通叟強奪  
田產咸正以法丁未春以七十有一上章謝事家居  
六年七十八所著有香泉稿二卷粉署餘閒稿一卷  
凝清集閩汴紀巡錄奏議及南征錄各若干卷藏於  
家

楊

能

附弟信

楊能字文敬六合人少隨伯父潁國公洪處兵間諳習孫吳法正統甲子從潁國戰伐有功陞開平衛所鎮撫時姪開平指揮使宗幼疾不任事潁國奏易其官從之戊辰冬戰賊灣河三岔口敗之己巳春擢都指揮僉事冬從潁國還朝賜賚有加時虜入近地詔令追勦遇賊紫荆倒馬二關連敗之擒獲野刺廝等景泰初元擢都指揮同知尋拜遊擊將軍禦邊宣府夏戰賊八里溝及荆子村敗之秋還朝擢都指揮使冬仍充遊擊將軍統神機京兵尋擢後軍都督僉事充左叅將鎮宣府夏進都督同知尋充左副總兵甲

戊春召還總神機京兵天順改元以迎復功擢左都督總兵宣府夏大同有警奮然請自行戰賊磨石山及石灰站敗之擒獲撞骨兒等秋進爵武強伯乃上疏欲乘虜弊舉兵殄之不許賜勅獎其忠勇戊寅賜誥券秋朶顏胡款塞吉虜且入寇能給以礮火諭使夜斫其營大敗之俘獻所獲於朝夏虜寇大同復請進討虜聞能至悉驚遁秋戰賊新河口敗之擒獲努沙等尋往獨石戰賊韭菜衝追至保昌州賊勢窮蹙悉棄輜重遁詔發兵策應大同賊聞其至夜遁去庚申閏十一月朔卒於軍能沈毅善謀臨戰決勝北虜



龍言憚以楊爺呼之至於軍法嚴明律身廉潔體悉士卒得其死力雖古名將不能過也初穎國佩鎮朔大將軍印鎮宣府能繼其職弟信佩征西將軍印鎮大同東西犄角保障邊陲武勇功名爲本朝邊將之冠云

顧儼

顧儼字廷望先世吳縣人洪武中以富室徙京師因家金陵儼幼負美質器宇魁梧有志於學早從里中師遊輒能詩賦工書法人皆奇之旣長侍季父主事公於京師從翰林張公士謙學學大進累試京闈不

偶乃歸教授鄉里遠近來學者履滿戶外正統戊辰  
巡按御史齊公聞其賢以經明行脩薦於朝召試優  
等授嘉興縣學訓導教人有法士多成就登名甲科  
景泰乙亥丁內艱服闋至京適朝廷選儒臣以充憲  
臺拜儼陝西道監察御史以績最賜勅命階文林郎  
持廉秉正糾擊不避人嚴憚之嘗巡視京倉善於立  
法盜息弊革奉勅清理福建軍政邊軍多有以詭名  
來擾者逮繫妻孥鄰里累年不絕儼究得其實罪其  
姦而雪其誣民始獲安沙汀民叛賊殺不辜領兵抵  
其境擒斬首惡餘黨悉平還朝陞廣東按察司僉事

時廣賊方熾至卽往高雷諸處招撫叛民新會楊江  
有賊數萬總戎趙公輔檄儼勦之提兵五千直擣賊  
巢斬首千餘級追復被擄男婦千餘人牛馬什器無  
算總戎上其功蒙銀器采段之賜在軍中不解甲者  
累月冒矢石犯霜露以勞致疾乞歸田里儼性孝友  
早喪父迎母就養官舍奉侍甚備少嘗鞠於伯父賢  
伯父卒無嗣每思及輒悲泣主事公嘗構疾幾危儼  
剖股煮液以進遂愈兄弟三人極相親愛無間爾汝  
交友以信義相與所得俸資輒以賑施故舊晚結屋  
城東時會鄉耆故友燕談爲樂或携尊出遊登山臨

水把酒賦詩澹然忘歸世事不以掛懷抱人皆高之  
卒年五十有五

童軒

童軒字士昂其先饒州鄱陽人永樂初以天官學召  
入欽天監家於秦淮幼穎敏讀書過目成誦領正統  
鄉薦登景泰辛未進士拜南京吏科給事中上疏言  
省冗員公考察倡武勇擇師儒杜倖進恤京民多見  
採納時有詔南京採辦翠毛魚鮑等物極論止之  
英廟復辟覽奏嘉其敢言尋上言弭盜安民數事尤  
切時弊甲申憲廟踐祚首上言帝王之治貴先本

而後末隆聖德用賢才納忠諫愛小民謹邊備之謂  
本而簿書刑名其末也且各詳本末施行之實反覆  
剴切 上優詔荅之令諸司舉行未幾四川盜作廷  
議推軒奉勅以往旣奏功還明年鎮巡官奏賊猖獗  
謫壽昌知縣尋陞雲南僉事提督學校甲午秋召拜  
太常少卿掌欽天監癸卯以疾乞休歸金陵蕭然一  
室不異布衣弘治戊申用廷議起仍掌天文事夏日  
有食之因奏日食紀元之初當盛夏火旺之候宜修  
德以爲取人之本窮理以爲燭奸之要進君子退小  
人以謹天戒是歲冬進右副都御史提督松藩軍務

辛亥春召爲南京吏部右侍郎甲寅進南京禮部尚書三年二疏乞致仕皆不許有操履清慎方切委任之諭軒感上知遇前後力陳數十言皆軍國要務丁巳以疾乞休致不許至冬請益力許之生平喜讀書爲文淵博雄麗詩有唐人體裁書法遒勁性篤孝友於物一介不苟取其廉勤慎密真不愧古人也所著有清風亭稿海岳涓埃諭蜀稿籌邊錄夢徵錄醢甕集若干卷

樊繼

樊繼字景昭句容人由邑庠生升太學起家學職正

統改元用少師東里楊先生薦爲興國州知州下車  
卽訓民以綱常之道擇其從違而勸懲之喪祭諸禮  
悉依文公所定不用浮圖未三年民化翕然庵觀寺  
院私剽者悉撤去驅其男女歸俗州治環水春夏爲  
民病率民築堤以障之傍植蒲柳中構橋亭以便憩  
息民因其堤曰樊公堤立碑志焉州有虎患禱於神  
數日兩虎自鬪死其他善政尤多廉介公平始終一  
致居七年引老致仕去之日州民耆幼男婦送者數  
千人莫不垂涕爲立去思碑

盧廷佐

盧廷佐保竹其別號也世居姑蘇以間右徙實京師  
占籍應天之江寧廷佐修髯廣頤兩頰如丹容儀秀  
偉頎然玉立韻度凝遠器識不凡少有大志慷慨負  
氣節性狷介不苟博極羣書靡不精貫甫成童選補  
郡庠弟子員中景泰癸酉鄉試登天順丁丑進士第  
視政戶部嘗奉使大同福建所至纖毫無染庚辰拜  
兵部武庫主事武庫職主清理天下戎伍利竇百出  
廷佐特以冰蘖著聲劉文安甚器重之自爲文以贈  
稱其於勢與利淡如也辛巳北虜寇陝西勢甚猖獗  
上命大司馬率六師討之未及行改命都憲王公



宏於是遴選廷臣之有幹局者往中省簡閱軍馬以益西兵廷佐首奉勅以行比至河南簡閱馬步精銳者得萬人及措置軍裝以給將行謂統帥不可不重而難其人藩臬咸以都指揮林盛材勇可任第鷺猛難馭徵召之果固辭且出不遜語廷佐立責之曰朝廷以高官厚祿蓄汝輩者正欲今日冀以禦侮汝臨事畏難若此 皇上官汝祿汝者何哉勿多言予第知劾正其罪耳盛聞之股慄奉命時衛輝守禦千戶楊英亦黥鷺方在遣中慮其合謀縱軍士爲暴復申明軍約給榜曉諭所至秋毫無犯民不知有兵至陝

西總戎輩見其士馬精壯御之嚴而有恩咸嘖嘖歎賞凱還王公入爲大司馬遇有邊報戎務必與之商確而後行如團營五軍三千神機爲十二營以至退冗兵禁私役皆委之綜理廷佐亦持正不阿權貴歛避請託不行事克以濟秩滿得拜武選郎中乃杜倖門革宿弊武銓以清能聲大著時尚書白公旣平荆襄回蒞部事益委任之而當道有欲以大壩功邀厚賞者執不從竟如常議由是銜之已丑春有詔凡方面缺許大臣會薦遂薦以可任叅議蓋擠之耳諸大臣皆謂未宜補外爭之不得乃以閩藩左叅議處焉

受命卽往時閩地大饑民攘竊巨室粟以苟朝夕建  
寧尤甚久之有已巳遺孽倡之嘯聚爲盜廷佐殫心  
撫濟招徠流移殆數萬人惟政和浦城山谿險阻盜  
據之爲巢穴有司莫得其要領乃擇所部善星數者  
二人命之曰汝爲予遍歷山溪間審廉之有所得必  
重賞泄機有罰無貸二人承命以往賊見術士不之  
疑託以問卜各吐情實二人假禍福以諭之諸賊色  
變具得其情狀以歸於是知其爲變非本意也乃輿  
入政和浦城山中直抵賊巢面諭之許以不死俾之  
立約期以豐年償所攘粟衆乃散去復陰遣人捕得

賊酋余文興等餘二十人械繫郡獄斃之一方以寧  
壬辰丁外艱歸毀瘠骨立襄事畢結廬墓側朝夕哀  
慟不輟忽有五色芝二十餘本產於墓之左右遠邇  
傳聞以爲孝感所致有司以聞詔旌其門乙未服闋  
卽家起爲浙藩叅議遂迎母夫人就養朝夕公服躬  
奉甘旨以適其志夜必率妻孥候寢所俟安寢始退  
以爲常佳時則具酒殽稱觴爲壽或效嬰兒歌舞以  
樂其心極歡乃罷復有五色芝一本產於公署叢竹  
之傍嘗守東陽邑民杜春與道士某僞立逋券誣良  
民逼索之反以誣告佐攝至因其辭色有異疑之乃

各幽一室俾不相通而以所書券紙互相詰問詞不相蒙其誣立白人服其明又巡三衢聞開化江山邑民爲處盜所掠躬歷二邑廣詢父老備山川險易修舉隘口砦堡立保甲相救之法復諭遠近募人捕盜開示賞格果於處之龍泉悉獲諸盜自是盜不敢踰境矣至常山邑有要地曰迎恩埠頭乃吳越閩楚之所必由地臨溪水壁立懸絕往來者罹顛躓之患鳩工甃石爲梁人甚便焉屬邑歲均徭必經藩司編理既定則榜示於衆俾知所應何役其費幾何所司匿榜而更張之鄉民弗及詳因得罔而取諸民皆舍

忿莫敢發廷佐乃創置關防由帖命里老率徭戶審之已乃書之由帖唱名而給俾有所據其弊乃革時海水泛溢沿海邑岸皆被衝齒而海鹽尤甚民不能田乃躬履斥鹵之地不避風日督屬修築民免於患丁酉陞右叅政督理糧儲受勅卽諄切戒諭盡祛里書出納之弊所司凜然畏服已丁內艱歸服除改授湖廣時桑植土官爭職互相殺戮劫印以逃積二十餘年不能結至是與臬副躬詣其地擒其渠魁置於法事遂解尋陞右布政使轉左立法嚴肅門庭清愆吏胥無所售其奸民以事至頃刻立辦雖僚寅有請

託者亦謝不從於是。有怨而毀之者，喟然曰：吾久勞於外年，且至可以休陰息駕之日矣。遂致政歸居家，凡十有五年以疾卒。

金紳

金紳字縉卿，上元縣人。景泰甲戌登進士，由庶吉士授刑科給事中。踰年，英宗復位，銳意求治，紳適掌科數，召對，所以寵待者甚至。上方有意留用，晏駕弗果。甲申，憲廟嗣位，進都給事中，首率同列論都指揮門達恣寵竊權，都御史王竑剛毅直諒，可任大事。宜亟召用，達因遠謫而竑起爲兵部尚書，紳於是

益以言責自任嘗陳時政八事一守新政二勤接見  
三納忠言四求賢才五備邊患六明黜陟七設武學  
八用武勇疏入悉見採納成化乙酉遣祀徐王滁陽  
王還時兩京河南水旱相仍漕舟不通疏陳事宜數  
條用之尋擢南京大理寺左少卿南京爲紳鄉里謝  
絕私謁訊鞠明敏獄囚多所平反凡十年譽望益盛  
乃有南京刑部右侍郎之命持法益謹每戒其屬曰  
民易犯法於無可矜疑者尤宜盡心數躬視囚獄給  
以衣糧以故囚少瘦死者戊戌江西大旱 詔往巡  
視至則先奏停力役徵收等事仍禁郡縣雖小費不



得擾民俄而新昌萬載諸縣盜發督捕有方獲其首  
誅之因舉救荒之政通鹽商增糴價及勸富民補官  
并折收船課皆以便宜行之全活不可勝計歷二年  
還任而卒年僅四十九耳性至孝父南安公致仕二  
十餘年左右侍養不違其志與其兄綬友愛尤篤自  
入官以簡約持已待其屬必厚平生好賢不倦勤於  
學問雖冗劇弗廢也所有心雪稿青瑣獻納稿江西  
巡視稿若干卷藏於家子麟壽文學孝友登進士未  
仕而卒

陳 達

陳達六合縣人初蔭授忠義左衛指揮同知景泰初  
被薦陞都指揮僉事鎮守通州等處督捕盜賊有功  
進都督同知尋被命鎮守倒馬關通州軍民保留之  
以成化二十一年卒賻殮葬祭如例達爲人沉鷲有  
謀蒞軍行事皆具遠識其督盜用刑不無過嚴然強  
橫斂跡居民安堵繼此莫有及者天順初于忠肅被  
誣遭刑是時羣兇氣焰炙手可畏達獨收屍骸斂葬  
剛毅之氣足以愧彼佞佞澆忍者矣

